



Sud Bosne i Hercegovine
Sud Bosne i Hercegovine

Broj: S1 3 IŽ 038371 20 IŽ
Sarajevo, 29.10.2020. godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Zvezdane Antonović kao predsjednika vijeća, Mirsade Džindo i Srete Crnjak kao članova vijeća, odlučujući o žalbi Bernesa Dautović i Melihe Dautović, Švajcarska, Ženeva, 1213 Petit-Lancy, izjavljenoj na odluku Centralne izborne komisije Bosne i Hercegovine, broj: 05-1-07-1-998/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 29.10.2020. godine donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broj birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Podnositelj žalbe osporava Odluku Centralne izborne komisije Bosne i Hercegovine, broj: 05-1-07-1-997/20 od 01.10.2020. godine u kojoj tvrdi da je njegovo kao i glasačko pravo njegove supruge zloupotrijebljeno jer je prijavljen za glasanje iz Srbije. Dodaje da živi u Ženevi i da se radi o lažnim prijavama i izbornoj krađi.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije, kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu, Centralna izborna komisija BiH je, prije donošenja ožalbene odluke, a prilikom razmatranja prijave na ime žalitelja - Bernesa i Melihe Dautović, utvrdila da su za iste dostavljeni obrasci prijave za glasanje izvan BiH uz koji su dostavljene kopije važećih ličnih karti. S obzirom da je prijava za glasanje izvan BiH ispunjavala sve uslove propisane

odredbom člana 3.15 Izbornog zakona BiH, žalitelji Bernes Dautović i Meliha Dautović se nalazi na izvodu iz Centralnog biračkog spiska za glasanje izvan BiH iz R Srbije.

U cilju potpunog i pravilnog utvrđenja činjeničnog stanja, imajući u vidu da navedena žalba nije potpisana i da žalitelj nije dostavio niti jedan dokaz kojim bi potkrijepio navode iz žalbe, Centralna izborna komisija BiH je zaključila da se radi o zloupotrebama biračkog prava, te da žalba nije osnovana.

Naime, u konkretnoj situaciji nesumnjivo se radi o zloupotrebi biračkog prava, međutim, Centralna izborna komisija BiH na osnovu raspoloživih činjenica nije bila u mogućnosti utvrditi ko je počinio zloupotrebu biračkog prava za glasanje izvan BiH, jer je zloupotreba mogla biti učinjena, kako od strane žalitelja, tako i od strane trećih lica. Međutim, u svakom slučaju žalitelji će biti u mogućnosti da iskoriste svoje biračko pravo i da po želji glasaju na svom redovnom biračkom mjestu u općini prema mjestu prebivališta.

Žaliteljima će, ukoliko na dan Lokalnih izbora 2020. godine dođu na redovno biračko mjesto određeno prema njihovom mjestu prebivališta, biti omogućeno da glasaju nepotvrđenim kovertiranim glasačkim listićima (član 5.18 Izbornog zakona BiH) koji će biti potvrđeni i prebrojani u Glavnom centru za brojanje, s tim što će Centralna izborna komisija BiH u Glavnom centru za brojanje izuzeti glasački materijal dostavljen eventualno i iz inostranstva na ime žalitelja i isti neće biti ponovo prebrojan, a sve u cilju spriječavanja zloupotreba biračkog prava i omogućavanja ostvarivanja biračkog prava biračima kojima ono zaista pripada.

Prema odredbi člana 5.18 Izbornog zakona BiH, ako se ime birača ne nalazi na izvodu iz Centralnog biračkog spiska zato što se birač upisao u Centralni birački spisak da glasa izvan zemlje, a vratio se da glasa lično u Bosni i Hercegovini, njegovo ime dodaje se na poseban obrazac koji sadrži sve podatke kao i izvod iz Centralnog biračkog spiska. Birač se potpisuje na izvod i ima pravo glasati nepotvrđenim-kovertiranim glasačkim listićem, u skladu sa odredbama ovog zakona.

S obzirom na navedeno apelaciono vijeće je ocijenilo da se pobijanom odlukom Centralne izborne komisije BiH ne povrijeđuje biračko pravo žalitelja.

Po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik vijeća
Sudija
Zvezdana Antonović

